

0.0.1 uttiya suttaṃ

1. atha kho uttiyo paribbājako yena bhagavā tenu-pasaṅkami. upasaṅkamitvā bhagavatā saddhiṃ sammodi. sammodanīyaṃ kathaṃ sārāṇīyaṃ vītisāretvā ekamantaṃ nisīdi. ekamantaṃ nisinno kho uttiyo pa-ribbājako bhagavantaṃ etadavoca:

2. kinnukho bho gotama ‘sassato loko, idameva saccaṃ moghamaññanti’? avyākataṃ kho evaṃ uttiya mayā ‘sassato loko, idameva saccaṃ, moghamaññanti’.

3. kīṃ pana bho gotama ‘asassato loko, idhameva saccaṃ moghamaññanti’? etampi kho uttiya avyākataṃ mayā ‘asassato loko, idameva saccaṃ moghamaññanti’.

4. kinnukho bho gotama ‘antavā loko, idameva saccaṃ moghamaññanti? avyākataṃ kho evaṃ uttiya mayā antavā loko, idameva saccaṃ, moghamaññanti’.

5. kīṃ pana bho gotama ‘anantavā loko, idhameva saccaṃ moghamaññanti’? etampi kho uttiya avyākataṃ mayā ‘anantavā loko, idameva saccaṃ moghamaññanti’.

6. kinnukho bho gotama ‘taṃ jīvaṃ taṃ sarīraṃ, idameva saccaṃ moghamaññanti? avyākataṃ kho evaṃ

uttiya mayā ‘taṃ jīvaṃ taṃ sarīraṃ, idameva saccaṃ, moghamaññanti’.

7. kīṃ pana bho gotama ‘aññaṃ jīvaṃ aññaṃ sarīraṃ, idameva saccaṃ moghamaññanti’? etampi kho uttiya avyākataṃ mayā ‘aññaṃ jīvaṃ aññaṃ sarīraṃ, idameva saccaṃ moghamaññanti’.

8. kinnukho bho gotama ‘hoti tathāgato parammaraṇā, idameva saccaṃ moghamaññanti’? avyākataṃ kho evaṃ uttiya mayā ‘hoti tathāgato parammaraṇā, idameva saccaṃ, moghamaññanti’.

9. kīṃ pana bho gotama ‘na hoti tathāgato parammaraṇā, idameva saccaṃ moghamaññanti’? etampi kho uttiya avyākataṃ mayā ‘na hoti tathāgato parammaraṇā, idameva saccaṃ moghamaññanti’.

10. kinnukho bho gotama ‘hoti ca na ca hoti tathāgato parammaraṇā, idameva saccaṃ moghamaññanti’? avyākataṃ kho evaṃ uttiya mayā ‘hoti ca na ca hoti tathāgato parammaraṇā, idameva saccaṃ, moghamaññanti’.

11. kīṃ pana bho gotama ‘neva hoti na na hoti tathāgato parammaraṇā, idameva saccaṃ moghamaññanti’? etampi kho uttiya avyākataṃ mayā ‘neva hoti na na hoti tathāgato parammaraṇā, idameva saccaṃ moghamaññanti’.

12. kinnu kho bho gotama sassato loko idameva saccaṃ moghamaññanti iti puṭṭho samāno ‘avyākataṃ kho etaṃ uttiya mayā sassato loko idameva saccaṃ moghamaññanti’ vadesi.

13. kimpana bho gotama asassato loko idameva saccaṃ moghamaññanti iti puṭṭho samāno etampi kho uttiya avyākataṃ mayā ‘asassato loko idameva saccaṃ moghamaññanti” vadesi.

14. kinnu kho bho gotama antavā loko idameva saccaṃ moghamaññanti iti puṭṭho samāno ‘avyākataṃ kho etaṃ uttiya mayā antavā loko idameva saccaṃ moghamaññanti’ vadesi.

15. kimpana bho gotama anantavā loko idameva saccaṃ moghamaññanti iti puṭṭho samāno etampi kho uttiya avyākataṃ mayā ‘anantavā loko idameva saccaṃ moghamaññanti” vadesi.

16. kinnu kho bho gotama taṃ jīvaṃ taṃ sarīraṃ idameva saccaṃ moghamaññanti iti puṭṭho samāno ‘avyākataṃ kho etaṃ uttiya mayā taṃ jīvaṃ taṃ sarīraṃ idameva saccaṃ moghamaññanti’ vadesi.

17. kimpana bho gotama taṃ jīvaṃ taṃ sarīraṃ idameva saccaṃ moghamaññanti iti puṭṭho samāno etampi kho uttiya avyākataṃ mayā ‘taṃ jīvaṃ taṃ sarīraṃ idameva saccaṃ moghamaññanti” vadesi.

18. kinnu kho bho gotama hoti tathāgato parammaraṇā idameva saccaṃ moghamaññanti iti puṭṭho samāno ‘avyākataṃ kho etaṃ uttiya mayā hoti tathāgato parammaraṇā idameva saccaṃ moghamaññanti’ vadesi.

19. kimpana bho gotama na hoti tathāgato parammaraṇā idameva saccaṃ moghamaññanti iti puṭṭho samāno etampi kho uttiya avyākataṃ mayā ‘na hoti tathāgato parammaraṇā idameva saccaṃ moghamaññanti’ vadesi.

20. kinnu kho bho gotama hoti ca na ca hoti tathāgato parammaraṇā idameva saccaṃ moghamaññanti iti puṭṭho samāno ‘avyākataṃ kho etaṃ uttiya mayā hoti ca na ca hoti tathāgato parammaraṇā idameva saccaṃ moghamaññanti’ vadesi.

21. kimpana bho gotama ‘neva hoti na na hoti tathāgato parammaraṇā idameva saccaṃ moghamaññanti iti puṭṭho samāno etampi kho uttiya avyākataṃ mayā ‘neva hoti na na hoti tathāgato parammaraṇā idameva saccaṃ moghamaññanti’ vadesi.

22. atha kiñcarahi bhotā gotamena vyākatanti?

23. abhiññāya kho ahaṃ uttiya sāvakānaṃ dhammaṃ desemi sattānaṃ visuddhiyā sokapariddavānaṃ sama-

tikkamāya dukkhadomanassānaṃ atthaṅgamāya ñāyassa adhigamāya nibbānassa sacchikiriyāyāti.

24. yaṃ panetaṃ bhavaṃ gotamo abhiññāya abhiññāya sāvakānaṃ dhammaṃ deseti sattānaṃ visuddhiyā sokapariddavānaṃ samatikkamāya dukkhadomanassānaṃ atthaṅgamāya ñāyassa adhigamāya nibbānassa sacchikiriyāya sabbo vā tena loko nīyissati¹ upaḍḍho vā tibhāgo vā ti?

25. evaṃ vutte bhagavā tuṇhī ahosi. atha kho āyasmato ānandassa etadahosi: ‘māhevaṃ kho uttiyo paribbājako pāpakaṃ diṭṭhigataṃ paṭilabhi. ‘sabbasā-mukkaṃsikaṃ vata me samaṇo gotamo pañhaṃ puṭṭho saṃsādeti, no vissajjeti, na nūna visahatī’ti. ta-dassa uttiyassa paribbājakassa dīgharattaṃ ahitāya dukkhāyā’ti.

26. atha kho āyasmā ānando uttiyaṃ paribbājakaṃ etadavoca: tena hāvuso uttiya upamaṃ te karissāmi. upamāya pi idhekacce viññū purisā bhāsitassa atthaṃ ājānanti.

27. seyyathāpi āvuso uttiya rañño paccantimaṃ nagaraṃ daḷahuddāpaṃ¹ daḷhapākāratoranaṃ ekadvāraṃ. tatrassa dovāriko paṇḍito byatto medhāvī aññātānaṃ nivāretā, ñātānaṃ pavesetā. so tassa nagarassa samantā anupariyāyapathaṃ anukkamamāno na

passeyya pākārasandhiṃ vā pākāravivaram vā anta-
maso biḷāra nikkamanamattampi, no ca khvassa evaṃ
ñāṇaṃ hoti: ettakā pāṇā imaṃ nagaraṃ pavisanti vā
nikkhamanti vāti. atha khvassa evamettha hoti: ye
kho keci oḷārikā pāṇā imaṃ nagaraṃ pavisanti vā nik-
khamanti vā sabbe te iminā dvārena pavisanti ca nik-
khamanti cāti.

28. evameva kho āvuso uttiya na taṃ tathāgatassa
evaṃ ussukkataṃ hoti ‘sabbo vā tena loko nīyissati,
upaḍḍho vā tibhāgo vā’ti. atha kho evamettha tathā-
gatassa hoti: ye kho keci lokamhā nīyimsu vā nīyanti
vā nīyissanti vā, sabbe te pañcanīvaraṇe pahāya ce-
taso upakkilese paññāya dubbalīkaraṇe catusu sati-
paṭṭhānesu supaṭṭhitacittā sattabojjhaṅge yathābhū-
taṃ bhāvetvā evamete lokamhā nīyimsu vā nīyanti vā
nīyissanti vā’ti.

29. yadeva kho tvaṃ āvuso uttiya bhagavantam pañ-
haṃ apucchi² tadevetam paññaṃ bhagavantam añ-
ñena pariyāyena apucchi. tasmā te taṃ bhagavā na
vyākāsīti.